

四庫全書

子部

欽定四庫全書

子部

神農本草經疏卷二十三

三五

詳校官太醫院吏目_臣周世泰

編修_臣倉聖脈覆勛

總校官進士_臣繆琪

校對官中書_臣孫溶

謄錄監生_臣陶鐸

欽定四庫全書

神農本草經疏卷二十三

明 繆希雍 撰

果部三品

總五十三種今疏其要者二十種又木部移入三

種

上品 藕實 藕蓮鬚附

橘柚 清波核葉附

大棗

覆盆子

雞頭實

中品 梅實

木瓜

柿

烏芋

枇杷葉

荔枝子

石蜜

甘蔗

沙糖

下品桃核仁

杏核仁

梨

胡桃

海松子

橄欖

龍眼

木部移入

赤瓜木

即山查木部移入

榧實

木部移入

藕實味甘平寒無毒主補中養神益氣力除百疾久服
輕身耐老不饑延年

疏○藟實得天地清芳之氣稟土中沖和之味故味
甘氣平別錄寒無毒入足太陰陽明兼入手少陰經
土為萬物之母後天之元氣藉此以生化者也母氣
既和則血氣生神得所養而疾病無由來矣藟實正
稟稼穡之化乃脾家之果故主補中養神益氣力除
百疾及久服輕身耐老不饑延年也孟詵主五臟不
足傷中益十二經脉血氣大明主止渴去熱安心止
痢治腰痛及洩精多食令人喜皆資其補益心脾之

功也

主治參互

得川黃連白芍藥白朮豆乾葛升麻紅麴橘紅甘草
滑石烏梅為丸治滯下如神 下痢飲食不食俗名
噤口痢此證大危用鮮蓮肉一兩黃連五錢人參五
錢水煎濃細細與呷服完思食便瘥 同菟絲子五
味子山茱萸山藥車前子肉豆蔻砂仁橘紅芡實人
參補骨脂巴戟天治脾腎俱虛五更溏瀉有肺熱者

去人參肉豆蔻 孟詵食療服食不饑石蓮肉蒸熟
去心為末煉蜜丸梧子大日服三十丸此僊家方也
普濟方白濁遺精石蓮肉龍骨益智仁等分為末
每服二錢空心米飲下 直指方心虛赤濁蓮子六
一湯用石蓮肉六兩炙甘草一兩為末每服一錢燈
心湯下 丹溪心法久痢噤口石蓮肉炒為末每服
二錢陳倉米湯調下便覺思食甚妙

簡誤

藕實脾家果也甘平無毒於諸疾竝無相迂第生者食之過多微動冷氣脹人石蓮子乃九月經霜後采堅黑如石者破房得之墮水入泥者良今肆中一種石蓮子狀如榧子其味大苦產廣中出樹上木實也不宜入藥

藕唐本注主熱渴散血生肌久服令人心懽藥性論云藕汁味乾能消瘀血不散藕節搥汁主吐血不止或口鼻出血孟詵云生食之主霍亂後虛渴煩悶不

能食其產後忌生冷物惟藕不同生冷為能破血故也蒸食甚補五臟實下焦陳藏器云消食止洩除煩解酒毒及病後熱渴日華子云止霍亂開胃消食除煩止悶口乾渴疾止怒令人喜破產後血悶搥窻金瘡並傷折止暴痛

疏○藕稟土氣以生其味甘生寒熟溫入心脾胃三經生者甘寒能涼血止血除熱清胃故主消散瘀血吐血口鼻出血產後血悶窻金瘡傷折及止熱渴霍

亂煩悶解酒等功熟者甘溫能健脾開胃益血補心
故主補五臟實下焦消食止洩生肌及久服令人心
懽止怒也本生於汙泥之中而體至潔白味甚甘脆
孔竅瓊瓏絲綸內隱療血止渴補益心脾真水果中
之嘉品也又能解蟹毒

蓮蕊鬚一名佛座鬚味甘澀氣溫本經不載而古方
固真補益方中往往用之詳其主治乃是足少陰經
藥亦能通手少陰經能清心入腎固精氣烏鬚髮止

吐血療滑洩同黃蘗砂仁沙苑蒺藜魚膠五味子覆
盆子生甘草牡蠣作丸治夢遺精滑甚良

橘皮味辛溫無毒主胸中瘕熱逆氣利水穀下氣止嘔
欸除膀胱留熱停水五淋利小便主脾不能消穀氣衝
胸中吐逆霍亂止洩去寸白久服去臭下氣通神輕身

長年

按橘柚實兩種本經作
一條蓋傳誤也今改正

疏○橘皮花開於夏實成於秋得火氣少金氣多故
味辛苦氣溫無毒味薄氣厚降多升少陽中之陰也

入手足太陰足陽明經其主胸中痲熱逆氣氣衝胸
中嘔欬者以肺主氣氣常則順氣變則逆逆則熱聚
於胸中而成痲痲者假也如痞滿鬱悶之類也辛能
散苦能洩溫能通行則逆氣下嘔欬止胸中痲熱消
矣脾為運動磨物之臟氣滯則不能消化水穀為吐
逆霍亂泄瀉等證苦溫能燥脾家之溼使滯氣運行
諸證自瘳矣肺為水之上源源竭則下流不利熱結
膀胱肺得所養而津液貫輸氣化運動故膀胱留熱

停水五淋皆通也去臭及寸白者辛能散邪苦能殺
蟲也通神輕身長年者利脾肺之極功也

主治參互

橘皮留白補脾胃和中去白消痰理肺氣同白朮則
補脾同甘草則補肺同補氣藥則益氣同泄氣藥則
破氣同消痰藥則能去痰同消食藥則能化食各從
其類以為用也 同人參何首烏桂枝當歸薑皮治

三日瘧寒多 得白豆蔻生薑藿香半夏治胃家有

寒痰或偶感寒氣傷冷食嘔吐不止 同人參白朮

白茯苓甘草山藥白豆蔻藿香麥芽山查白藕豆治

脾胃虛飲食不化或不欲食食亦無味 同蘇子貝

母枇杷葉麥門冬桑根白皮沙參栝樓根五味子百

部治上氣咳嗽能消痰降氣 同枳殼烏藥木香草

豆蔻檳榔治氣實人暴氣壅脹 同蒼朮厚朴甘草

為平胃散治胸中脹滿 入二陳湯治脾胃溼痰及

寒痰痰飲 仲景方橘皮湯治男女傷寒並一切雜

病嘔噦手足逆冷者用橘皮四兩生薑一兩水二升煎一升徐徐呷之即止 百一選方霍亂吐瀉但有一點胃氣存者服之即生廣陳皮去白五錢真藿香五錢水二盞煎一盞時時溫服 食療治脚氣衝心或心下結硬腹中虛冷陳皮一斤和杏仁五兩去皮尖熬少入蜜搗和丸如梧桐子大每日食前米飲下三十丸 普濟方大腸悶寒陳皮連白酒煮焙乾研末每服二錢米飲下 適用方脾寒諸瘧不拘老少

孕婦只兩服便止真橘皮去白切生薑自然汁浸過
一指銀石器內重湯煮乾焙研末每服三錢用隔年
青州棗十箇去核水一盞煎半盞發前服以棗下之
張氏方婦人乳癰未成者即散已成者即潰痛極
者不痛神驗不可言用真橘皮湯浸去白曬乾麩炒
微黃為末每服二錢麝香調酒下初發一服見効

簡誤

橘皮味辛氣溫能耗散真氣中氣虛氣不歸元者忌

與耗氣藥同用胃虛有火嘔吐不宜與溫熱香躁藥
同用陰虛咳嗽生痰不宜與半夏南星等同用瘧非
寒甚者亦勿施

青橘主氣滯下食破積結及隔氣

即青皮

疏○青皮古方無用者至宋時醫家始用之其色青
其味極苦而辛其氣溫而無毒氣味俱厚沈而降陰
也入足厥陰少陽苦泄辛散性復剌削所以主氣滯
下食破結疾及膈氣也元素破堅癖散滯氣治左脇

肝經積氣亦此意耳

主治參互

青皮同人參鼈甲能消瘧母 同枳殼肉桂川芎治
左脇痛 同人參白朮三稜蓬茂阿魏礬紅山查紅
麴木香消瘕癖氣塊及一切肉食堅積

簡誤

青皮性最酷烈削堅破滯是其所長然過服之立損
人真氣為害不淺凡欲施用必與人參朮芍藥等補

脾藥同用庶免遺患必不可單行也肝脾氣虛者概勿施用

橘核主腰痛膀胱氣腎冷炒去殼酒服良

按橘核出日華子其味苦溫而下氣所以能入腎與膀胱除因寒所生之病也疝氣方中多用

橘葉古今方書不載能散陽明厥陰經滯氣婦人妬乳內外吹乳巖乳癰用之皆效以諸證皆二經所生之病也

大棗味甘平無毒主心腹邪氣安中養脾助十二經平
胃氣通九竅補少氣少津液身中不足大驚四肢重和
百藥補中益氣強力除煩悶療心下懸腸癖久服輕身
延年不饑神仙

疏○大棗純得土之沖氣兼感天之微陽以生本經
味甘氣平無毒東垣孟詵言溫氣味俱厚陽也又足
太陰陽明經經曰裏不足者以甘補之又曰形不足
者溫之以氣甘能補中溫能益氣甘溫能補脾胃而

生津液則十二經脈自通九竅利四肢和也正氣足則神自安故主心腹邪氣及大驚中得緩則煩悶除故療心下懸急及少氣脾得補則氣力强腸胃清故主身中不足及腸澼甘能解毒故主和百藥脾胃足氣血充後天生氣借此而盈溢故久服輕身長年不饑神仙也然亦指辟穀修煉者言之非恒人所能耳

主治參互

大棗甘溫能和陰陽調榮衛生津液凡邪在榮衛者

辛甘以解之故仲景桂枝湯用薑棗以和榮衛助脾胃生津液令汗出也 仲景治傷寒水飲脇痛咳而乾嘔者有十棗湯取其益土而勝水也 又方發汗後小便利其人臍下悸欲作奔豚者茯苓桂枝甘草大棗湯主之茯苓能伐腎邪桂枝泄奔豚甘草大棗之甘滋助脾土以平腎氣 許叔微本事方治婦人臍燥悲傷欲哭象若神憑數父者大棗湯大棗十枚小麥一升甘草二兩每服一兩水煎服之

簡誤

棗雖能補脾胃益氣然而味過於甘中滿者忌之小兒疳病不宜食齒痛及患痰熱者不宜食生者尤不利人多食致寒熱

覆盆子味甘平無毒主益氣輕身令髮不白

疏○覆盆子得木氣而生本經味甘氣平無毒甄權微熱宗奭酸甘深得其義入足少陰經其主益氣者言益精氣也腎藏精腎納氣精氣充足則身自輕髮

不白也蘇恭主補虛續絕強陰建陽悅澤肌膚安和
臟腑甄權主男子腎精虛竭陰痿女子食之有子大
明主安五藏益顏色養精氣長髮強志皆取其益腎
添精甘酸收斂之義耳

主治參互

同黃檗沙苑蒺藜蓮鬚五味子砂仁魚膠山茱萸治
夢遺洩精 同車前子五味子菟絲子蒺藜子為五
子衍宗丸治男子精氣虧乏中年無子 加入巴戟

天媪胸臍補骨脂鹿茸白膠山茱萸肉蓯蓉治陽虛
陰痿臨房不舉或精寒精薄

簡誤

強陽不倒者忌之

雞頭實味甘平無毒主溼痺腰脊膝痛補中除暴疾益
精氣強志令耳目聰明久服輕身不饑耐老神仙一名
芡

疏○雞頭實稟水土之氣以生故味甘氣平無毒入

足太陰少陰補脾胃固精氣之藥也脾主四肢足居於下多為溼所侵以致腰脊膝痛而成痺脾氣得補則溼自不容留前證皆除矣脾主中州益脾故能補中腎藏精與志入腎故主益精強志暴病多屬火得水土之陰者能抑火故主除暴疾也精氣足脾胃健則久服耳目聰明輕身不饑耐老神仙所自來矣

主治參互

君山藥白茯苓白朮人參蓮肉薏苡仁白扁豆為補

脾胃要藥 一味搗末熬金櫻子煎和丸服之補下

元益人謂之水陸丹 經驗方雞頭粥法用雞頭實

三合煮熟去殼粳米一合煮粥日日空心食能益精

氣強志意利耳目 永類鈐方四精丸治思慮色欲

過度損傷精氣小便數遺精用秋石白茯苓芡實蓮

肉各二兩為末蒸棗和丸梧子大每服三十九空心

鹽湯送下

簡誤

芡實生食味澀動風冷氣小兒不宜多食以其難消化也

梅實味酸平無毒主下氣除熱煩滿安心肢體痛偏枯不仁死肌去青黑痣惡疾上下痢好唾口乾

疏○梅實即今之烏梅也梅得木氣之全故其味最酸所謂曲直作酸是也經曰熱傷氣邪客於胸中則氣上逆而煩滿心為之不安烏梅味酸能斂浮熱能吸氣歸元故主下氣除熱煩滿及安心也下痢者大

腸虛脫也好唾口乾者虛火上炎津液不足也酸能
斂虛火化津液固腸脫所以主之也其主肢體痛偏
枯不仁者蓋因溼氣侵於經絡則筋脉弛縱或疼痛
不仁肝主筋酸入肝而養筋肝得所養則骨正筋柔
機關通利而前證除矣其主去死肌青黑痣惡肉者
白梅之功也白梅味鹹鹹能軟堅故也又能消痰醒
睡止霍亂解酒毒弘景云生梅烏梅白梅功用大約
相似第烏梅較良資用更多

主治參互

烏梅同川黃連白芍藥滑石甘草蓮肉白蘊豆葛根
升麻紅麴橘紅作丸治滯下如神 一味作湯代茶
飲治火炎頭痛 仲景烏梅丸治疣厥虵上入膈故
煩須臾復止得食而嘔又煩者虵聞食即出故耳用
烏梅三百箇細辛附子人參桔梗黃檗各六兩當歸
蜀椒各四兩黃連一斤乾薑十兩搗烏梅肉和丸桐
子大先食飲服十九日三服 劉涓子鬼遺方蝕惡

瘡努肉用烏梅肉燒為灰傅上惡肉立盡 聖惠方
赤痢腹痛烏梅肉黃連各四兩煉蜜丸梧子大每米
飲下二十九日三服 圖經本草治勞瘧用烏梅十
四枚豆豉二合甘草三寸生薑一塊以童便二升煎
去一半溫服即止 治暑氣霍亂白梅一箇和仁搗
碎入絲瓜葉一葉或菟豆葉再搗爛用新汲水調灌
下即解

簡誤

素問云味過於酸肝氣以津又云酸走筋筋病無多
食酸以肝主筋性喜升發酸味斂束是違其性之所
喜也梅實過酸不宜多食齒痛及病當發散者咸忌
之

木瓜實味酸溫無毒主溼痺脚氣霍亂大吐下轉筋不
止

疏○木瓜實得春生之氣稟曲直之化故其味酸氣
溫性無毒氣薄味厚降多於升陽中陰也入足太陰

陽明兼入足厥陰經其主溼痺脚氣者以脾主四肢
又主肌肉性惡溼而喜燥溼侵肌肉則為溼痺傷足
絡則成脚氣木瓜温能通肌肉之滯酸能斂濡滿之
溼則脚氣溼痺自除也霍亂大吐下轉筋不止者脾
胃病也夏月溼暑飲食之邪傷於脾胃則揮霍撩亂
上吐下瀉甚則肝木乘脾而筋為之轉也温酸能和
脾胃固虛脫兼之入肝而養筋所以能療肝脾所生
之病也藏器治脚氣衝心強筋骨下冷氣止嘔逆大

明主吐瀉水腫心腹痛好古治腹脹善噫心下煩痞
無非取其去溼和胃滋脾益肺利筋骨調榮衛通行
收斂有竝行不悖之功也

主治參互

得白菟豆藿香白茯苓橘皮白梅人參白朮甘草砂
仁香薷治傷暑霍亂吐瀉不止加入石斛雞舌香治
轉筋 同當歸石斛牛膝續斷芍藥橘皮治血勞轉
筋 同薏苡仁朮茯苓五加皮石斛草薢黃檗治溼

熱腳氣 同人參白茯苓麥門冬藿香白豆蔻竹茹
枇杷葉治胃虛嘔吐 一味末之白湯吞三錢日五
服治楊梅結毒有效 八六和湯治暑月霍亂 聖
惠方治霍亂轉筋木瓜一兩酒一升煎服不飲酒者
煎湯服仍煎湯浸青布裹其足 御藥院方四蒸木
瓜丸治肝腎脾三經氣虛為風寒暑溼相薄流注經
絡凡遇時令不和七情怫鬱必致發動或腫滿或頑
痺憎寒壯熱嘔吐自汗霍亂吐利用宣州大木瓜四

箇切蓋剝空聽用一箇入黃耆續斷末各半兩於內
一箇入蒼朮橘皮末各半兩於內一箇入烏藥黃松
節末各半兩於內黃松節即茯神心中木也一箇入
葳靈仙苦苧蒨末各半兩於內以原蓋蓋好拴定用
酒浸透入甑內蒸熟曬乾再浸蒸如此三度搗末以
榆皮末水和糊丸如梧子大每服五十丸溫酒鹽湯
任下 醫林集要翻花痔瘡木瓜為末以鱣魚身上
涎調貼之以紙護住

簡誤

下部腰膝無力由於精血虛真陰不足者不宜用傷食脾胃未虛積滯多者不宜用入藥忌犯鐵器

柿味甘寒無毒主通鼻耳氣腸澀不足

疏○柿稟地中之陰氣以生故味甘氣寒無毒入手足太陰經鼻者肺之竅也耳者腎之竅也金水二臟最忌火熱二臟有火上炎則外竅閉而不通得甘寒之氣俾火熱下行竅自清利矣肺與大腸為表裏溼

熱傷血分則為腸澼不足甘能益血寒能除熱臟氣清而腑病亦除矣 乾柿寒氣稍減能厚腸胃補不足潤肺止渴功同於前 柿霜清心肺間熱生津止渴化痰寧嗽治喉舌口瘡總之其功長於清肅上焦火邪兼能益脾開胃故三者所主雖不同而其源皆歸於一義也

主治參互

柿霜得桑根白皮百部天麥門冬沙參貝母蘇子枳

把葉橘紅栝樓根作丸噙化治肺經有火咳嗽生痰
簡誤

柿性寒肺經無火因客風寒作嗽者忌之冷痢滑洩
腸胃虛脫者忌之脾家素有寒積及感寒腹痛感寒
嘔吐者皆不得服不宜與蟹同食令人腹痛作瀉

烏芋味苦甘微寒無毒主消渴痺熱溫中益氣

一名勃臍

疏○烏芋稟土金之氣以生本經味苦甘氣微寒無
毒然詳其用味應有辛辛能散苦能泄故主痺熱甘

寒能除熱而生津故主消渴熱去則氣自益氣益則中自溫自然之道也孟詵主下丹石消黃疸除胸中實熱氣汪機主療五種膈氣消宿食治誤吞銅物及今人治腹脹下血等證皆取其辛寒消散除熱之功也

主治參互

烏芋去皮填入雄猪肚內線縫砂器煮糜食之勿入鹽治腹滿脹大 善毀銅銅器中煮之即烱 誤吞

銅物以烏芋合胡桃食一二斤許即消 一味曬乾
為末服能辟蠱毒 神秘方大便下血勒臍搥汁大
半鍾入酒少許溫服二日見效

簡誤

孟詵云烏芋性冷先有冷氣人不可食多食令人患
腳氣又孕婦忌之

枇杷葉味苦平無毒主卒呃不止下氣

疏○枇杷葉稟天地清寒之氣四時不凋其味苦氣

平平即涼也無毒入手太陰足陽明經氣薄味厚陽中之陰降也經曰諸逆衝上皆屬於火火氣上炎則為卒惋不止惋者噦也其聲濁惡而長經曰樹枯者葉病病深者聲噦病者見此是為危證枇杷葉性涼善下氣氣下則火不上升而胃自安故卒惋止也其治嘔吐不止婦人產後口乾男子消渴肺熱咳嗽喘息氣急脚氣上衝皆取其下氣之功氣下則火降痰順而嘔者不嘔渴者不渴咳者不咳衝逆者不衝逆

矣又治婦人發熱咳嗽經事先期佐補陰清熱之藥服之可使經期正而受孕

主治參互

同生地黄麥門冬白芍藥炙甘草枸杞子桑根白皮
童便茅根天門冬蘇子五味子栝樓根治陰虛咳嗽
吐血 入噲化丸治肺熱咳嗽 同竹茹木瓜蘆根
汁石斛麥門冬人參白茯苓治胃熱嘔吐加童便人
乳竹瀝蘇子白芍藥蔗漿治噎膈反胃 同白芍藥

生地黃青蒿子五味子黃檗阿膠枸杞子杜仲牡丹皮鼈甲作丸治婦人經行先期發熱無孕 同人參

白芍藥茯苓竹茹橘紅蘇子麥門冬木瓜治妊娠惡

阻 同栝樓根天門冬枸杞子五味子石斛白芍藥

黃連甘草蘆根汁童便竹葉治消渴 龐安常方溫

病發噦因飲水多者枇杷葉去毛炙香茅根各半斤

水四升煎二升稍稍飲之 聖惠方衄血不止枇杷

葉去毛焙研末茶服一二錢日二服

簡誤

胃寒嘔吐及肺感風寒咳嗽者法並忌之

荔枝子味甘平無毒止渴益人顏色

疏○荔枝子南方果也感天之陽氣得地之甘味本
經雖云平而其氣實溫也鮮時味極甘美多津液故
能止渴甘溫益血助榮氣故能益人顏色也多食令
人發熱或衄血齒痛者以其生於炎方熟於夏月故
善助火發熱耳入藥甚稀無主治簡誤

核味甘溫主心痛小腸氣痛癩疔婦人血氣刺痛以一枚煨存性研末酒調服蓋其氣溫而通行入肝腎散滯氣辟寒邪所以能療如上諸證也

主治參互

荔枝核同牛膝補骨脂延胡索合歡子茴香木瓜杜仲橘核萆薢治疔氣虛熱者加黃檗虛寒者加桂孫氏方治疔氣癩腫荔枝核炒黑色大茴香炒等分為末每服一錢溫酒下 又方腎腫如斗荔枝核青

橘皮茴香等分各炒研酒服二錢日三 除疝氣外

無他用故不著簡誤

石蜜

乳糖也

味甘寒無毒主心腹熱脹口乾渴性冷利

疏○石蜜乃煎甘蔗汁曝之凝如石而體甚輕今之
白沙糖也其味甘其氣寒其用在脾故主心腹熱脹
甘寒能除熱生津液故止口乾渴及咳嗽生痰也多
食亦能害脾以其味太甘耳

甘蔗味甘平無毒主下氣和中助脾氣利大腸

疏 甘蔗稟地中之沖氣故味甘氣平無毒曰華子
云冷氣薄味厚陽中之陰降也入手足太陰足陽明
經甘為稼穡之化其味先入脾故能助脾氣脾主中
州故主和甘寒除熱潤燥故主下氣利大腸也大
明為其消痰止渴除心胸煩熱解酒毒今人用以治
噎膈反胃嘔吐大便燥結皆取其除熱生津潤燥之
功耳

主治參互

蔗漿一味單服能潤大便下燥結 同蘆根汁梨汁
藕汁人乳童便竹瀝和勻時時飲之治胃脘乾枯噎
食嘔吐 梅師方反胃吐食蔗漿七升薑汁半升和
勻日日細呷

簡誤

甘蔗世人皆以其性熱不敢多食不知乃是甘寒之
物能瀉火熱潤枯燥唐王摩詰櫻桃詩云飽食不須
愁內熱大官還有蔗漿寒可為證矣惟胃寒嘔吐中

滿滑洩者忌之

沙糖味甘寒無毒功用與石蜜同而冷利過之

疏○沙糖蔗漿之清而煎煉至紫黑色者本經雖云與石蜜同功然而不逮石蜜多矣既經煎煉之多則未免有溼熱之氣故多食損齒生蟲發疔脹滿令人心痛等害與鯽魚同食成疔蟲與葵同食生流澀與笋同食不消成癥身重不能行今醫家用作湯下小兒丸散殊為未當

桃核仁味苦甘平無毒主瘀血血閉瘕邪氣殺小蟲止
欬逆上氣消心下堅除卒暴擊血破癥瘕通月水止痛
疏○桃核仁稟地二之氣兼得天五之氣以生故其
味苦重甘微氣平無毒思邈言辛孟詵言溫皆有之
矣氣薄味厚陽中之陰降也入手足厥陰經夫血者
陰也有形者也周流乎一身者也一有凝滯則為癥
瘕瘀血血閉或婦人月水不通或擊撲傷損積血及
心下宿血堅痛皆從足厥陰受病以其為藏血之臟

也若能泄滯辛能散結甘溫通行而緩肝故主如上
等證也心下宿血去則氣自下軟逆自止桃為五木
之精能鎮辟不祥故主 氣味苦而辛故又能殺小
蟲也

主治參互

仲景桃仁承氣湯治傷寒溼熱在內小便利而大便
黑為畜血用桃仁五十粒桂枝二兩大黃四兩朴硝
二兩甘草一兩以水七升煮取二升半去滓內芒硝

更上火微沸空心溫服五合日三當微利 入抵當
湯治太陽病六七日表證仍在脈微而沈反不結胸
其人如狂者以熱在下焦少腹當硬滿小便自利下
血乃愈用桃仁二十粒水蛭三十箇熬蝨蝨三十箇
去翅足熬大黃三兩酒浸以水五升煮取三升溫服
一升不止再服 同當歸芍藥澤蘭延胡索蘇木五
靈脂紅花牛膝生地黃益母草治產後瘀血結塊作
痛並治壯盛婦人經閉不通 同當歸麻仁地黃麥

門冬芍藥黃芩肉蓯蓉甘草治大腸血燥便秘不通
同番降香川通草山查穿山甲乳香沒藥紅花續
斷當歸治上部內傷瘀血作痛 聖濟總錄大便不
快裏急後重用桃仁三兩去皮以吳茱萸二兩食鹽
一兩同炒熟去二物每嚼桃仁五七粒效兼可預辟
瘴癘 刪煩方婦人難產數日不出桃仁一箇劈開
用硃砂書一片可字一片出之吞之即生 肘後方
婦人陰癢桃仁杵爛綿裹塞之杏仁亦可用

簡誤

桃仁性善破血凡血結血秘血燥瘀血留血畜血血痛血癥等證用之立通第散而不收瀉而無補過用之及用之不得其當便使血下不止損傷真陰為害非細故凡經閉不通由於血枯而不由於瘀滯產後腹痛由於血虛而不由於留血結塊大便不通由於津液不足而不由於血燥閉結法並忌之

桃梟味苦微溫主殺百鬼精物療中惡腹痛殺精魅

五毒不祥一名桃奴

疏○桃梟是桃實着樹經冬不落者正月采之桃為五木之精仙木也最能辟邪今道家禁呪鎮魔之術猶有用桃木者本經以桃梟主殺諸精鬼不祥亦此意耳况着於樹上最久得氣尤全苦温之性又能通滯散邪者乎治血之功與桃仁同

主治參互

桃梟煨存性同椶皮灰蒲黃朱砂京墨為末臨臥以

童便調服三錢小便解色漸淡為度治內傷吐血神
效 同番降香辰砂治鬼擊吐血 聖惠方伏梁結
氣在心下不散桃奴三兩為末空心溫酒下每服二
錢

簡誤同桃仁

杏核仁味甘苦溫冷利有毒主欬逆上氣雷鳴喉痺下
氣產乳金瘡寒心貢豚驚癩心下煩熱風氣去來時行
頭痛解肌消心下急殺狗毒

疏○杏核仁稟春溫之氣而兼火土之化以生故本
經味甘氣溫別錄加苦有毒其言冷利者以其性潤
利下行之故非真冷也氣薄味厚陰中微陽降也入
手太陰經太陰為清肅之臟邪客之則欬逆上氣火
炎乘金則為喉痺杏仁潤利而下行苦溫而散滯則
欬逆上氣喉痺俱除矣其主心下煩熱者邪熱客於
心肺之分也風氣去來時行頭痛者肺主皮毛風邪
自外而入也溫能解肌若能泄熱故仲景麻黃湯中

用之亦取其有發散之功也主產乳金瘡者亦指為
風寒所乘者言之消心下急者以其潤利而下氣也
心寒賁豚者心虛而腎邪凌之也驚癇者痰熱盛也
雷鳴者大腸不和也總之取其下氣消痰溫散甘和
苦洩潤利之功也

主治參互

同桑根白皮前胡薄荷桔梗蘇子貝母甘草五味子
橘紅紫苑治風寒入肺咳嗽生痰 入麻黃湯治太

陽病無汗惡寒喘急 千金方欬逆上氣以杏仁三升去皮尖炒黃研膏入蜜一合杵熟每食前含之嚥汁 梅師方食狗肉不消心下堅脹口乾發熱妄語杏仁一升去皮尖水三升煎減半取汁分三服效

簡誤

杏仁性溫散肺中風寒滯氣殊效第陰虛咳嗽肺家有虛熱熱痰者忌之風寒外邪非壅逆肺分喘急息促者不得用產乳金瘡無風寒擊襲者不得用驚癇

喉痺亦非必須之藥用者詳之雙仁者能殺人本經
言有毒蓋指此耳

梨味甘微酸寒多食令人寒中金瘡乳婦尤不可食

疏○梨成於秋花實皆白其得西方之陰氣者乎味
甘微酸氣寒無毒入手太陰兼入足陽明經別錄著
梨止言其害不叙其功陶隱居言梨不入藥蓋古人
論病多主於風寒外邪以溫熱為補藥多桂附凡冷
利之物輟而不用也不知時運迭降稟受遞殊今時

之人火病熱病痰病往往皆是梨能潤肺消痰降火
除熱故蘇恭主熱嗽止渴貼湯火傷治客熱中風不
語傷寒寒熱解丹石熱氣驚邪利大小便大明主賊
風心煩氣喘熱狂孟詵主胸中痞塞熱結等誠不可
闕者也本經言多食令人寒中者以其過於冷利也
乳婦金瘡不可食者以血得寒則凝而成瘀為病也
凡人有痛處脉數無力或發渴此癰疽將成之候惟
晝夜食梨可轉重為輕膏粱之家厚味醞酒縱恣無

節必多痰火卒中癰疽之病數食梨可變危為安功
難盡述

主治參互

梨汁同霞天膏竹瀝童便治中風痰熱 同人乳蔗
漿蘆根汁童便竹瀝治血液衰少漸成噎膈 普濟
方消渴飲水用香水梨或鵝梨雪梨皆可取汁以蜜
和熬成膏瓶收不時白湯調服一二匙 崔元亮海
上方卒得咳嗽用上好梨去核搗汁一碗入椒四十

粒煎一沸去滓納黑錫一大兩消訖細細含嚙立定
食療本草啞風失音搗梨汁一盞飲之日再服

聖惠方小兒風熱昏惰躁悶不能食用消梨三枚切
破以水二升煮取汁一升入粳水一合煮粥食之

治小兒內熱痰壅喉間吐不出或因驚熱生痰或因
風熱生痰取梨汁時時與之加牛黃分許神效 圖
經赤目努肉日夜痛者取好梨一顆搗絞汁以黃連
切片一錢浸汁內取汁仰臥點之 聖濟總錄反胃

轉食藥物不下用大雪梨一箇以丁香十五粒刺入
梨內溼紙包四五重煨熟去丁香食之

簡誤

肺寒咳嗽脾家泄瀉腹痛冷積寒痰痰飲婦人產後
小兒痘後胃冷嘔吐及西北真中風證法咸忌之

橄欖味酸甘溫無毒主消酒療鯀鮫毒

疏○橄欖本經味酸甘今嘗之先澀而後甘得土中
之陽氣氣溫無毒肺胃家果也能生津液酒後嚼之

不渴故主消酒甘能解毒故能療鯀鮎毒也馬志云
鯀鮎即河豚也人誤食此魚肝及子必迷悶至死惟
橄欖汁煮服之必解其木作檝撥着魚皆浮出故知
物有相畏如此不特味甘解毒之義也

主治參互

食諸魚被鯀用橄欖嚼汁嚥之無橄欖時即覓核研
末急流水調服亦效 手抓碎成瘡用橄欖磨濃汁
塗之能滅癩痕 直指方腸風下血橄欖燒存性研

末每服二錢陳米飲調下 乾坤生意耳足凍瘡椒
攪燒研油調塗之

胡桃味甘平無毒食之令人肥健潤肌黑髮取瓢燒令
黑末斷煙和松脂研傅癩癰瘡又和胡粉為泥拔白鬚
髮以內孔中其毛皆黑多食利小便能脫人眉動風故
也去五痔外青皮染髭

疏○胡桃稟火土之氣以生本經雖云甘平然其氣
多熱而性潤益血脉補命門之藥也血不充則消瘦

肌膚不澤及鬚髮易白益血故令人肥健潤肌黑鬚
髮也多食利小便者以其能入腎固精令水竅常通
也傳癰癰者甘熱能解毒散結去五痔取其潤腸除
溼之功也能脫人着者熱極則生風風甚則萬物搖
落之象也青皮性溫故能染髭

主治參互

一味勿去黃皮空腹食之最能固精 同補骨脂蒺
藜蓮鬚鹿茸麥門冬巴戟天覆盆子山茱萸五味子

魚膠益命門種子最效 入青娥丸能黑鬚髮補右

腎方見補骨脂條 御藥院方胡桃丸益血補髓強

筋壯骨延年明目悅心潤肌能除百病用胡桃肉四

兩搥膏入補骨脂杜仲萹薺末各四兩杵勻丸梧子

大每空心溫酒鹽湯任下五十丸 普濟方產後氣

喘胡桃肉人參各二錢水一盞煎七分頓服 李樓

方誤吞銅錢多食胡桃自化出也 聖惠方揩齒烏

鬚胡桃仁燒過貝母各等分為散日日用之 聖濟

總錄血崩不出胡桃肉十五枚燒存性研作一服空心温酒調下神效 子和儒門事親便毒初起用胡桃七箇燒研酒服不過三服效 楊試經驗方魚口便毒端五日午時取樹上青胡桃筐內陰乾臨時全燒為末酒服少行一二次有膿自大便出無膿即消 二三服平上二方應加全蝎穿山甲尤妙 圖經本草壓撲損傷胡桃仁搗和温酒頓服便瘥

簡誤

胡桃前人多言其有害不可食孫思邈云多食動痰
飲令人惡心吐水蘇頌云性熱不可多食馬志云多
食動風脫人眉同酒食多令人咯血汪穎曰多食生
痰動腎火然而近世醫方用治痰氣喘嗽和傷補命
門潤血脉大腸及癘風諸病而酒家往往以之佐酒
則多食吐水咯血脫眉動火之說亦未盡然也但性
本熱惟虛寒者宜之如肺家有痰熱命門火熾陰虛
吐衄等證皆不得施

海松子味甘小温無毒主骨節風眩眩去死肌髮白散
水氣潤五藏不飢生新羅

疏○海松子氣味香美甘温甘温助陽氣而通經則
骨節中風水氣及因風頭眩死肌自除矣氣温屬陽
味甘補血血氣充足則五臟自潤髮白不飢所由來
矣仙方服食多餌此物故能延年輕身不老也

龍眼味甘平無毒主五藏邪氣安志厭食除蟲去毒久
服強寃聰明輕身不老通神明

自木部
移入

疏○龍眼稟稼穡之化故其味甘氣平無毒入足太
陰手少陰經少陰為君主之官藏神而主血甘能益
心補心則君主強神明通五藏邪氣俱除矣甘味補
脾胃得補則食自寡而飫心得補則火下降而坎離
交故能安志肝藏魂主納血心家血滿則肝有所受
而魂強甘能解毒故主去毒久服聰明耳目輕身不
老總之補益心脾之驗也至於除蟲非其所能略之
可也

主治參互

同生地黃天麥門冬丹參栝子仁遠志蓮實五味子
茯苓人參能補心保神益氣強志 嚴用和濟生方
歸脾湯治思慮過度勞傷心脾健忘怔忡虛煩不眠
自汗驚悸用龍眼肉酸棗仁炒黃耆炙白朮焙茯苓
各一兩木香半兩炙甘草二錢半哎咀每服五錢薑
三片棗一枚水二鍾煎一鍾溫服

赤爪木實味酸冷無毒汁服主水痢沫頭及洗身上瘡

痒

自木部移入即今
山查一名棠棧

疏○山查稟木氣而生本經云味酸氣冷然觀其能
消食積行瘀血則其氣非冷矣入足陽明太陰經二
經有積滯則成下痢產後惡露不盡畜於太陰部分
則為兒枕痛山查能入脾胃消積滯散宿血故治水
痢及產婦腹中塊痛也大抵其功長於化飲食健脾
胃行結氣消瘀血故小兒產婦宜多食之本經誤認
為冷故有洗瘡癢之用

主治參互

同礬紅黃連紅麴消肉積 同紅麴麥芽橘皮白朮
肉豆蔻厚朴砂仁能消食健脾 同牛膝生地黃當
歸續斷益母草澤蘭牡丹皮蒲黃芍藥治產後兒枕
作痛 衛生易簡方偏墜疝氣山查肉茴香炒各一
兩為末糊丸梧子大每服一百丸空心白湯下

簡誤

山查性能尅化飲食若胃家無食積及脾虛不能運

化不思食者多食之反致尅伐脾胃生氣如脾胃虛兼有積滯者當與補藥同施亦不宜過用也物類相感志云煮老雞硬肉入山查數顆即易爛其消食尅伐之力彰矣

榷實味甘無毒主五痔去三蟲蠱毒鬼疰

木部移入

疏○榷實稟土氣以生本經味甘無毒然嘗其味多帶微澀詳其用應是有苦氣應微寒氣薄味厚陰也降也入手太陰陽明經五痔三蟲皆大腸溼熱所致

苦寒能瀉溼熱則大腸清寧而二證愈矣其主蠱毒
鬼疰者以其甘能解毒而苦寒能滌除腸胃邪惡氣
耳

主治參互

孟詵食療治寸白蟲日食榧子七顆滿七日蟲皆化
為水也 簡便方好食茶葉面黃者每日食榧子七
枚以愈為度

神農本草經疏卷二十三

欽定四庫全書

神農本草經疏卷二十四

明 繆希雍 撰

總七種今疏其要者四種

胡麻

麻子

胡麻油

飴糖

胡麻味甘平無毒主傷中虛羸補五內益氣力長肌肉
填髓腦堅筋骨療金瘡止痛及傷寒溫瘧大吐後虛熱

羸困久服輕身不老明耳目耐饑渴延年一名巨勝

疏○胡麻稟天地之冲氣得稼穡之甘味故味甘氣平無毒入足太陰兼入足厥陰少陰氣味和平不寒不熱益脾胃補肝腎之佳穀也弘景云八穀之中惟此為良仙家作飯餌之斷穀長生故主傷中虛羸補五內益氣力長肌肉堅筋骨填髓腦及傷寒溫瘧大吐後虛熱羸困久服明耳目耐饑渴輕身不老延年也金刃傷血則瘀而作痛甘平益血潤燥故療金瘡

止痛也日華子主補中益氣潤養五臟補肺氣止心
驚利大小腸逐風濕氣遊風頭風勞氣產後羸困李
廷飛云風病人久服則步履端正語言不蹇陳士良
生嚼塗小兒頭瘡煎湯浴惡瘡及婦人陰瘡皆取其
甘平益血脈補虛羸入肝脾腎之功耳劉河間云麻
木穀而治風又云治風先治血血活則風去胡麻入
肝益血故風藥中不可闕也

主治參互

得何首烏茅山蒼朮白茯苓菖蒲桑葉牛膝當歸續
斷地黃桑上寄生治風濕痺 同甘菊花天門冬黃
檉生地黃何首烏栢子仁桑葉牛膝枸杞子麥門冬
作丸治似中風口眼喎斜半身不遂久服不輟有神
驗 一味丸蒸九曝加茅山蒼朮乳蒸曬三次作丸
能健脾燥濕益氣延年 枹朴子服食胡麻法用上
黨胡麻三斗淘淨蒸令氣透日乾以水淘去沫再蒸
如此九度去殼炒香為末白蜜或棗膏丸彈子大每

溫酒化下一丸日三服忌毒魚狗肉生菜菘至百日
能除一切痼疾一年病色光澤不饑二年白髮還黑
三年齒落更生久服長生不老矣 外臺秘要解下
胎毒小兒初生嚼生脂麻綿包與兒啞之其毒自下
簡便方小兒瘰癧脂麻連翹等分為末頻頻食之
經驗後方蜘蛛及一切蟲咬傷油麻研爛傳之

三因方穀賊尸咽喉中毒痛癢此因誤吞穀芒戟刺
癢痛也用脂麻炒研白湯調下 甘平無毒補益為

用仙家服食所須故不著簡誤

麻子味甘平無毒主補中益氣中風汗出逐水利小便
破積血復血脈乳婦產後餘疾長髮可為沐藥久服肥
健不老神仙

疏○麻子即大麻仁稟土氣以生本經味甘平無毒
然其性最滑利甘能補中中得補則氣自益甘能益
血血脈復則積血破乳婦產後餘疾皆除矣風併於
衛則衛實而榮虛榮者血也陰也經曰陰弱者汗自

出麻仁益血補陰使榮衛調和風邪去而汗自止也
逐水利小便者滑利下行引水氣從小便而出也好
古云入手足陽明足太陰經陽明病汗多及胃熱便
難三者皆燥也用之以通潤經曰脾欲緩急食甘以
緩之麻仁之甘以緩脾潤燥故仲景脾約丸用之

主治參互

食醫心鏡麻子仁粥治風水腹大腰臍重痛不可轉
動用冬麻子半升研碎水濾取汁入粳米二合煮稀

粥下葱椒鹽豉空心食 仲景方麻子仁丸治脾約

大便秘而小便數麻子仁二升芍藥半斤厚朴一尺

大黃枳實各一斤杏仁一升熬研煉蜜丸梧子大每

以漿水下十九日三服不知再加 本事方產後秘

塞許學士云產後汗多則大便秘難於用藥惟麻

子粥最穩不惟產後可服凡老人諸虛風秘皆妙用

大麻子仁紫蘇子各二合洗淨研細再以水研濾取

汁一盞分二次煮粥啜之 夏子益奇疾方截腸怪

病大腸頭出寸餘痛苦乾則自落又出名為截腸病
若腸盡則不治但初覺截時用器盛脂麻油坐浸之
飲大麻子汁數升即愈也

簡誤

陳士良云多食損血脈滑精氣痿陽事婦人多食即
發帶疾以其滑利下行走而不守也

胡麻油微寒利大腸胞衣不落生者摩瘡腫生禿髮

此即

烏脂麻油也功用與白麻油相同而力更勝入藥當以烏者為佳

疏○麻油甘寒而滑利故主胞衣不下及利大腸生
者氣更寒能解毒涼血故摩瘡腫生禿髮也藏器主
天行熱悶腸內熱結服一合取利為度孟詵主瘡癩
殺五黃下三焦熱毒氣通大小腸治虵心痛傳一切
惡瘡疥癬殺一切虫日華子煎膏生肌長肉止痛消
癰腫補皮裂皆取其甘寒滑利除濕潤燥涼血解毒
之功也

主治參互

入血餘一味熬膏鉛丹收好能傳一切瘡毒排膿止痛諸熬膏必用真胡麻油以其涼血解毒也惟濕氣膏不用嶺南解蠱法以清油多飲取吐效衛生易簡方解河豚毒一時倉卒無藥以清麻油多灌取吐出毒物即效亦能解砒毒胎產須知婦人難產因血枯澇者用清油半兩好蜜一兩同煎數十沸溫服胎滑即下他藥無益以此助血為效直指方癰疽發背初起即服此使毒氣不內攻以麻油一斤

銀石器內煎二十餘沸和醇醋二碗分五次一日服
盡 百一選方腫毒初起麻油煎葱黑色趁熱通手
旋塗自消 又方丹石毒發發熱者不得食熱物不
得用火但着厚衣煖臥取清油一匙含嚥 劉禹錫
傳信方蚰蜒入耳用麻油作煎餅枕臥須臾自出

簡誤

麻油生者過寒多食發冷疾及脾胃虛寒作瀉者不
宜食熬熱治飲食甚美但須逐日熬用不可過宿若

經宿則火性反復能助熱動氣也

飴糖味甘微溫主補虛乏止渴去血

疏○飴糖用麥蘖或穀蘖同諸米漬熬煉而成故其味甘氣溫無毒入足太陰亦入手太陰經甘入脾而米麥皆養脾胃之物故主補虛乏仲景建中湯用之是也肺胃有火則發渴火上炎迫血妄行則吐血甘能緩火之標則火下降而渴自止血自去也思邈又謂其有消痰潤肺止嗽治咽痛吐血等功

主治參互

入建中湯治脾虛腹痛 簡便方誤吞稻芒白飴頻
食效 千金方服藥過劑悶亂者飴糖食之

簡誤

飴糖成於濕熱少用雖能補脾潤肺然而過用之則
動火生痰凡中滿吐逆酒病牙疳咸忌之腎病尤不
可服

神農本草經疏卷二十四

欽定四庫全書

神農本草經疏卷二十五

明 繆希雍 撰

總二十三種今疏其要者十一種

生大豆

赤小豆

酒

粳米

籼米

小麥

大麥

葉附

麴

神麴附

菹豆

豉

菹豆

生大豆味甘平塗癰腫煮汁飲殺鬼毒止痛逐水脹除
胃中熱痺傷中淋露下瘀血散五藏結積內寒殺烏頭
毒久服令人身重炒為屑味甘主胃中熱去腫除痺消

穀止腹脹

惡五參龍膽得前
胡杏仁牡蠣良

疏○生大豆蘇頌云有黑白二種黑者入藥白者不
用其緊小者為雄入藥尤佳稟土氣以生而色黑則
象水故味甘氣平無毒平即兼涼為腎家之穀也甘
平能活血解毒祛風散熱故主塗癰腫止痛殺鬼毒

烏頭毒除胃中熱痺傷中淋露下瘀血散五臟結積
內寒消穀也色黑屬水同氣相求故能逐水腫腹脹
仙方修治末服之可以辟穀度饑然初服時似乎身
重一年以後便覺輕健也陳藏器炒令黑烟未斷及
熱投酒中飲之治風痺癱緩口噤產後諸風及風癩
陰毒腹痛食罷生吞半兩去心胃煩熱熱風孟詵主
中風脚弱產後諸疾同甘草煮湯飲去一切熱毒氣
及風毒脚氣和桑柴灰煮食下水鼓腹脹搗塗一切

腫毒日華子主調中氣通關脈制金石藥毒解牛馬
瘟病皆取其活血散風除熱解毒下氣利水之功耳

主治參互

同澤蘭益母草蘇木人參牛膝荆芥生地黃童便蒲
黃治產後血暈悶絕 同蔓荆子土茯苓金銀花甘
菊花玄參川芎天麻芽荅荆芥烏梅治偏頭風痛有
神 古方紫湯破血去風除氣散熱產後兩日尤宜
服之用黑豆五升清酒一斗將豆炒令烟絕投酒中

待酒紫赤色去豆量性飲之神驗中風口噤加雞屎
白二升和炒投之 廣利方脚氣衝心煩悶不識人
以大豆一升水三升濃煮汁服未定再服 扁鵲方
三豆子飲能稀痘見菜豆條內 大豆殼同蜜蒙花
穀精草黃連木賊草決明子甘菊花金銀花生地黃
羚羊角羊肝治小兒痘後目翳

簡誤

生大豆岐伯云生溫熱寒葳蕤云生平炒食極熱煮

食極寒觀本經及孟詵云生搗塗腫毒則生者非溫矣經又云炒為屑主胃中熱則炒者又非極熱矣應是生平炒溫煑寒無疑忌猪肉小兒以炒豆猪肉同食必壅氣致死十有八九十歲以上則無害也服草麻子者忌炒豆犯之脹滿致死服厚朴者亦忌之最能動氣故也

赤小豆味甘酸平無毒主下水排癰腫膿血寒熱熱中消渴止洩利小便吐逆卒澀下脹滿

疏○赤小豆稟秋燥之氣以生本經味甘酸氣平無
毒然詳其用味應有辛非辛平則不能排癰腫膿血
及療寒熱熱中消渴也凡水腫脹滿洩瀉皆濕氣傷
脾所致小豆健脾燥濕故主下水腫脹滿止洩利小
便也十劑云燥可去濕赤小豆之屬是矣吐逆者氣
逆上升也卒澀者大腸濕熱也甘酸斂逆氣辛平散
濕熱故亦主之

主治參互

陳藏器本草赤小豆和桑根白皮煮食去濕氣痺腫
孟詵食療同鯉魚煮食甚治脚氣 金匱要略傷寒
狐惑病脈數無熱微煩默默但欲臥汗出初得之三
四日目赤如鳩眼七八日目四眦黃黑若能食者膿
已成也赤豆當歸散主之赤小豆三升浸令芽出當
歸三兩為末漿水服方寸七日三服 甄權藥性熱
毒癰腫赤小豆為末雞子白調塗 蘇頌圖經治脚
氣以袋盛此豆置足下朝夕展轉踐踏之遂愈

簡誤

陶弘景云小豆逐津液利小便久服令人枯燥凡水腫脹滿總屬脾虛當雜補脾胃藥中用之病已即去勿過劑也其治消渴亦借其能逐胃中熱從小便利去若用之過多則津液竭而渴愈甚不可不戒也酒味苦甘辛大熱有毒主行藥勢殺百邪惡毒氣

疏○酒品類極多醇醜不一惟米造者入藥用經云酒者熱穀之液其氣悍弘景云大寒凝海惟酒不冰

明其性熱獨冠羣物製藥多用之以藉其勢人飲多則體弊神昏是其有毒故也博物志云昔三人冒霧晨行一人飲酒一人飽食一人空腹空腹者死飽食者病飲酒者健此酒勢辟邪惡毒氣之效勝於他物也葳蕤主通血脈厚腸胃潤皮膚消憂發怒宣言暢意無非取其橫行經絡走散皮膚開發宣通之功耳

主治參互

諸藥可造酒者五加皮女貞實仙靈脾薏苡仁天門

冬麥門冬地黃菖蒲枸杞子人參何首烏甘菊花黃
精桑椹木蜜仙茅松節栢葉竹葉胡麻磁石蠶沙烏
白蛇鹿茸羊羔膈肭臍黑豆之類各視其所生之病
擇其所主之藥入麴米如常釀酒法釀成飲或袋盛
入酒內浸數日飲之 肘后方鬼擊諸病卒然着人
如刀刺狀胃腸腹內切痛不可抑按或吐血鼻血下
血以醇酒吹兩鼻內良 又方馬氣入瘡或馬汗馬
毛入瘡皆致腫痛煩熱入腹則殺人多飲醇酒至醉

即愈 千金方三十年耳聾酒三升漬牡荊子一升
七日去滓任性飲之 梅師方產後血悶清酒一升
和生地黃汁煎服

簡誤

王好古曰酒能引諸經不止與附子相同味之辛者
能散苦者能下甘者能居中而緩用為導引可以通
行一身之表至極高之分古人惟以麥造麴釀黍已
為辛熱有毒今之醞者加以烏頭巴豆桂薑之類大

毒大熱之藥以增其氣味豈不傷冲和損精神酒榮
衛竭天癸而天夫人壽耶朱震亨云本草止言酒熱
而有毒不言濕中發熱近於相火醉後振寒戰慄可
見矣又性喜升氣必隨之痰鬱於上溺瀆於下恣飲
寒涼其熱內鬱於肺與大腸其始也病淺或嘔吐或
瘡疥或鼻鼾或泄利或心脾痛尚可散而去之其久
也病深或消渴或內疽或肺癰或鼓脹或喉啞或哮
喘或勞瘵或痔漏為狀不一非具眼未易處也扁鵲

云過飲腐腸爛胃潰髓蒸筋生痰動火亡精耗血傷
神損壽孟詵云軟筋骨動氣痢醉臥當風則成癱風
醉浴冷水成痛痺陳士良云凡服丹砂鍾乳諸石藥
並不可長用酒下能引石藥氣入四肢滯血化為癰
疽截器云凡飲酒忌甜物同牛肉食令人生蟲合乳
飲令人氣結諸如此類不可勝載令人有喜以火逼
極熱恣飲為快不知酒性既熱又以火濟火鮮有不
為害者曾見一人好飲火酒不幾年患一惡證吐膿

血瘀肉而斃蓋肺為火熱腐爛也酒能合歡解憂禦
寒祛疾自古至今循習為常用之物然而如上等
害不可不曉惟在樽節度量寒溫適宜不至沉湎荒
亂斯得酒中之趣者古人終日飲不及亂用此道耳
震亨又云醇酒冷飲有三益予謂三益未必然而傷
肺生疾動火損胃之害可差免矣

粳米味甘苦平無毒主益氣止煩止洩

疏○粳米即人所常食米感天地冲和之氣同造化

生育之功為五穀之長人相賴以為命者也經曰安穀則昌絕穀則亡仲景曰人受氣於水穀以養神水穀盡而神去自古聖人樹藝至今不可一日無此也稟土德之正其味甘而淡其性平而無毒雖專主脾胃而五臟生氣血脈精髓因之以充溢周身筋骨肌肉皮膚因之而強健本經益氣止煩止洩特其餘事耳

主治參互

入白虎湯治作勞人傷寒發熱虛羸少氣氣逆上衝
欲吐 少陰病下痢膿血或腹滿下如魚腦者桃花
湯主之粳米一升赤石脂一斤一半全一半末乾薑
一兩以水七升煮米令熟去滓溫服七合內赤石脂
末方寸七日三服若一服愈餘勿服已上仲景法

聖濟方小兒初生無皮色赤但有紅筋乃受胎未足
也用早白米粉撲之肌膚自生 千金方嗜食生米
成瘕用白米五合雞屎一升同炒焦為末水一升頓

服少時吐出痰如研米汁或白沫淡水乃愈也

藖米味苦無毒主寒中下氣除熱

疏○藖米即稻藖也味甘氣溫無毒具生化之性故為消食健脾開胃和中之要藥脾胃和則中自溫氣自下熱自除也

主治參互

澹療方啟脾進食穀神丸用穀藖四兩為末入薑汁鹽少許和作餅焙乾入炙甘草砂仁白朮麩炒各一

兩為末白湯點服或丸服

小麥味甘微寒無毒主除熱止燥渴咽乾利小便養肝
氣止漏血唾血以作麴溫消穀止痢以作麴溫不能消
熱止煩

疏○小麥稟四時中和之氣故其味甘氣微寒無毒
入手少陰經少陰有熱則燥渴咽乾解少陰之熱則
燥渴咽乾自止心與小腸為表裏臟氣清腑病亦自
除故利小便肝心為子母之臟子能令母實故主養

肝氣甘寒走二經而能益血涼血故止漏血唾血也
麩性溫所以能消穀止痢麩性熱故不能消熱止煩
北方霜雪多地氣厚熱性減凡入藥以北來者為勝
浮麥即水淘浮起者能止自汗盜汗亦以北方者良
古方有用寒食麩者寒食日以紙袋盛麩懸風處數
十年亦不壞取其熱性去而無毒也

主治參互

奉親書老人五淋身熱腹滿小麥一升通草二兩水

三升煮一升飲之良 生生編走氣作痛用小麥麩
拌醎醋炒熱袋盛熨之 麵作蒸餅和藥取其易消
也

簡誤

小麥寒氣全在皮故麵去皮則熱熱則壅滯動氣發
渴助濕令人體浮皆其害也凡大人脾胃有濕熱及
小兒食積疳脹皆不宜服然北人以之代飯常御而
不為患者此其地勢高燥無濕熱熏蒸之毒故麵性

亦溫平能厚腸胃強氣力補虛助五臟其功不減於
稻粟耳東南卑濕春多雨水其濕熱之氣鬱於內故
食之過多每能發病也夏月瘡痢人尤不宜食

大麥味鹹溫微寒無毒主消渴除熱益氣調中又云令
人多熱為五穀長蜜為之使

疏○大麥功用與小麥相似而其性更平涼滑膩故
人以之佐粳米同食或歉歲全食之而益氣補中實
五臟厚腸胃之功不亞於粳米矣陳士良云補虛劣

壯血脈化穀食止洩瀉不動風氣久食令人肥白滑
肌膚為麵無燥熱勝於小麥蘇恭云平胃止渴消食
療脹滿其為效可知本經末云令人多熱與上文及
諸說相背必是誤入也

麥蘖蘇頌云化宿食破冷氣止心腹脹滿日華子溫
中下氣開胃止霍亂除煩消痰破癥結

疏○麥蘖以水漬大麥而成其味鹹氣溫無毒功用
與米蘖相同而此消化之力更緊鹹能軟堅溫主通

行其發生之氣又能助胃氣上行陽道而資健運
故主開胃補脾消化水穀及一切結積冷氣脹滿如
上所言等證也好古曰麥芽神麴二藥胃氣虛人宜
服之以代戊己腐熟水穀豆蔻縮砂烏梅木瓜芍藥
五味子為之使

主治參互

麥蘖同山查紅麴橘皮草果砂仁厚朴蒼朮消食積
快膈進食麥芽四兩神麴二兩白朮橘皮各一兩

為末蒸餅丸梧子大每人參湯下三五十九 李絳
兵部手集產後腹脹不通轉氣急坐臥不安以麥蘖
一合為末和酒服良久通轉神驗 婦人經驗方產
後青腫乃血水漬也乾漆大麥蘖等分為末新瓦中
鋪漆一層蘖一層重重令滿鹽泥固濟煅赤研末熱
酒調服二錢產後諸疾並宜 丹溪方產後回乳產
婦無子食乳乳不消令人發熱惡寒用大麥蘖二兩
炒為末每服五錢白湯下甚良

簡誤

麥蘖能消導米麩諸菓食積無積滯脾胃虛者不宜
用久服消腎氣墮胎

麩味甘大暖療藏腑中風氣調中下氣開胃消宿食主
霍亂心膈氣痰逆除煩破癥結補虛去冷氣除腸胃中
塞不下食令人有顏色六月作者良神麩使無毒能化
水穀宿食癥氣健脾煖胃

疏○古人用麩即造酒之麩其氣味甘溫性專消導

行脾胃滯氣散臟腑風冷故主療如諸家所言也神
麴乃後人專造以供藥用力倍於酒麴蓋取諸神聚
會之日造之又取各藥物以象六神之用故得神名
陳久者良入藥炒令香用六畜食米多脹欲死者煮
麴汁灌之立消造神麴法用五月五日或六月六
日以白麴百斤青蒿自然汁三升赤小豆末杏仁泥
各三升蒼耳自然汁野蓼自然汁各三升以配白虎
青龍朱雀玄武勾陳騰蛇六神用汁和麴豆杏仁作

餅麻葉或楮葉包罽如造醬黃法待生黃衣曬乾收之

主治參互

神麩開胃健脾消食止泄同山查麥蘖穀蘖縮砂陳皮草菓藿香白朮乾葛蓮肉等用效 百一選方療痞滿暑泄麩朮丸用神麩炒蒼朮泔製炒等分為末糊丸梧子大每米飲下五十丸 和劑局方健胃思食治脾胃俱虛不能消化水穀膏膈痞悶腹脇膨脹

連年累月食減嗜臥口無味神麴六兩麥蘖炒三兩
乾薑炮四兩烏梅肉焙四兩為末蜜丸梧子大每米
飲下五十九日三服 摘玄方食積心痛陳神麴一
塊燒紅淬酒二大碗服之

簡誤

脾陰虛胃火盛者不宜用能落胎孕婦宜少食

菹豆味甘微溫主和中下氣 葉主霍亂吐下不止

疏○菹豆稟土中沖和之氣其味甘氣香性溫平無

毒入足太陰陽明經氣分通利三焦升清降濁故專
治中宮之病和中下氣消暑除濕而解毒也孟詵主
霍亂吐痢不止及嘔逆久食頭不白日華子云補五
臟蘇頌主女子帶下解酒毒河豚魚毒寇宗奭主霍
亂轉筋皆取其益脾開胃和中氣除濕熱之功耳葉
氣味相同故亦主霍亂花有紫白二色豆有黑白二
種入藥惟紫花豆白者良豆黑色及紫色者名鵲豆
不入藥亦不益人

主治參互

白藕豆同山藥白茯苓人參蓮肉薏苡仁芡實為補
脾胃之上藥中焦中濕者加白朮 同黃連乾葛白
芍藥升麻紅麴滑石烏梅橘紅甘草蓮肉治滯下如
神 同麥門冬五味子黃連乾葛能解酒毒 同木
瓜石斛橘皮藿香茯苓縮砂香薷治霍亂吐瀉轉筋
入十味香薷飲能消暑氣健脾 奇效良方血崩
不止白藕豆花焙乾為末每服二錢空心炒米煮飲

入鹽少許調下即效 治霍亂秘法用白菹豆葉一
葉同白梅一枚并仁研爛新汲水調服神效 蘇恭
治吐利後轉筋用白扁豆葉一把搗入醋少許絞
汁服立瘥

簡誤

弘景云患寒熱者不可食蓋指傷寒寒熱外邪方熾
不可用此補益之物耳如脾胃虛及傷食勞倦發寒
熱者不忌

豉味苦寒無毒主傷寒頭痛寒熱瘴氣惡毒煩躁滿悶
虛勞喘吸兩脚疼冷

疏○豉諸豆皆可為之惟黑豆者入藥有鹽淡二種
惟江右淡者治病經云味苦寒無毒然詳其用氣應
微溫蓋黑豆性本寒得蒸曬之氣必溫非苦溫則不
能發汗開腠理治傷寒頭痛寒熱及瘴氣惡毒也苦
以湧吐故能治煩躁滿悶以熱鬱胸中非宣劑無以
除之如傷寒短氣煩躁胸中懊懣饑不欲食虛煩不

得眠者用梔子豉湯吐之是也又能下氣調中辟寒
故主虛勞喘吸及兩脚疼冷

主治參互

肘後方云傷寒有數種庸人卒不能分別者今取一
藥兼療之凡初覺頭痛身熱脈洪一二日以葱豉湯
治之用葱白一虎口豉一升綿裹水三升煮一升頓
服取汗 仲景梔子豉湯治傷寒汗下後虛煩用梔
子十四枚香豉四合綿裹以水四升先煮梔子得二

升半內豉煮取一升半去滓分二服溫進一服得吐
止後服 又枳實梔子豉湯治大病瘥後勞復用枳
實三枚梔子十四枚豉一升以清漿水七升空煮取
四升內枳實梔子取二升下豉更煮五六沸去滓分
溫再服令微似汗傷寒之邪自外入勞復之邪自內
發發汗吐下當隨宜施治也治傷寒食早成食復前
湯中加大黃如博碁子大五枚 梅師方辟除溫疫
豉和白朮浸酒常服之 甄權方傷寒暴痢腹痛者

豉一升薤白一握切以水三升先煮薤內豉更煮湯色黑去豉分二服不瘥更服亦治血痢 孟詵治久

患盜汗以豉一升熬令香清酒三升清滿三日取汁冷煖任服不瘥更作二劑即止 簡要濟衆方傷寒

後餘毒攻手足及身體虛腫用豉五合微炒以酒一升半同煎五七沸任性飲之 千金方蠮螋尿瘡杵

豉傅之良 衛生易簡方中牛馬毒豉汁和人乳頻服之效 千金方中酒成病豉葱白各半升水二升

煮一升頓服 又方服藥過劑悶亂者豉汁飲之
肘後方腫從脚起豉汁飲之以滓傳之 弘景云春
夏之氣不和以豉蒸炒酒漬服之至佳

簡誤

凡傷寒傳入陰經與夫直中三陰者皆不宜用熱結
胸中煩悶不安者此欲成結胸法當下不宜復用汗
吐之藥并宜忌之

菘豆味甘寒無毒主丹毒煩熱風癩藥石發動熱氣奔

狔生研絞汁服亦煮食消腫下氣壓熱解石用之勿去皮令人小壅

疏○菘豆稟土中之陰氣故其味甘氣寒無毒入足陽明經夫丹石之藥氣悍而性熱多服則火動上升為煩熱甚則口鼻出血狂悶躁擾甘寒能除熱下氣解毒故主服丹石藥人毒發煩熱也陽明客熱則發出風癩以胃主肌肉熱極生風故也解陽明之熱則風癩自除脹滿者濕熱侵於脾胃也熱氣奔狔者濕

熱客於腎經也除濕則腫消壓熱則氣下益脾胃而
腎邪亦自平也孫思邈主寒熱熱中止泄痢卒辟利
小便脹滿日華子主厚腸胃作枕明目治頭風頭痛
益氣除熱毒風孟詵主去浮風益氣力治消渴和五
臟安精神可常食之功效不可備述

主治參互

扁鵲三豆飲治天行痘瘡預服此飲疎解熱毒縱出
亦少菘豆赤小豆黑豆各一升甘草節二兩以水

八升煮極熱任意吞豆飲汁七日乃止 醫學正傳
痘後癰毒初起以三豆膏治之神效菘豆赤小豆黑
大豆等分為末醋調時時掃塗即消 全幼心鑑小
兒毒腫菘豆五錢大黃二錢為末用生薄荷汁入蜜
調塗候中砒毒者研汁飲之

簡誤

脾胃虛寒滑泄者忌之

神農本草經疏卷二十五

欽定四庫全書

神農本草經疏卷二十六

明 繆希雍 撰

總一十八種今疏其要者三種

醋

稻米

醬

醋味酸溫無毒主消癰腫散水氣殺邪毒

一名苦酒

疏○醋惟米造者入藥得溫熱之氣故從木化其味

酸氣溫無毒酸入肝肝主血血逆熱壅則生癰腫酸

能斂壅熱溫能行逆血故主消癰腫其治產後血暈
癥塊血積亦此意耳散水氣者水性泛濫得收斂而
寧謐也殺邪毒者酸苦湧瀉能吐出一切邪氣毒物
也日華子主下氣除煩婦人心痛血氣并產後及傷
損金瘡出血迷悶殺一切魚肉菜毒取其酸收而又
有散瘀解毒之功也故外科傳藥中多資用

主治參互

仲景方少陰病脈微細但欲寐咽中傷生瘡不能言語

聲不出者苦酒湯主之用半夏十四枚雞子一枚
去黃以苦酒半夏着雞子殼中置刀鐮中安火上令
三沸去滓少少含嚥之不差更作三劑 仲景金匱
方黃耆芍藥苦酒湯治黃汗汗出沾衣正黃如藥汁
因汗出時入水中浴水從汗孔入得之用黃耆五兩
芍藥三兩桂枝三兩以苦酒一斗水七升相和煮取
三升溫服一升當心煩服至六七日乃解 衍義云
產婦房中常以火炭沃醋氣為佳酸氣能斂血使下

也 孟詵食療青木香以醋磨汁服止卒心痛 浸黃檗含之治口瘡 千金方身體卒腫醋和蚯蚓屎傳之 又方舌腫不消以酢和釜底墨厚傳舌之上 下脫則更傳須臾即消 又方湯火傷灼即以酸酢淋洗并以酢泥塗之良亦無癩痕喉痺咽痛以醱醋探吐之

簡誤

經曰酸走筋筋病毋多食酸凡筋攣偏痺手足屈伸

不便皆忌之又曰味過於酸肝氣以津脾氣乃絕多
食酸則肉皺而脣揭言能助肝賊脾凡脾病者亦不
宜過食

稻米味苦主溫中令人多熱大便堅

疏○稻米即今之糯米也稟土中之陽氣其味應甘
氣應溫無毒造酒必用之者以其性近於熱也為補
脾胃益肺氣之穀脾胃得補則中自溫大便亦堅實
溫能養氣氣充則身自多熱大抵脾肺虛寒者宜之

為其能益氣溫中也故又有止泄利縮小便收自汗
發痘瘡等用

主治參互

松莖經驗方久洩食減以糯米一升水浸一宿瀝乾
炒熟磨篩入懷山藥一兩每日清晨用半盞入白砂
糖二匙胡椒末少許以滾湯調食大有滋補久服更
能令人精暖育子 醫方大成顛犬咬傷糯米一合
斑猫七枚同炒熬黃去之再入七枚再炒黃去之又

入七枚待米出烟去猫為末水調服之小便利下佳
亦可油調外傳 又方虛勞不足糯米入猪肚內蒸
熟日食

簡誤


糯米孟詵云發風動氣久食令人多睡藏器云久食
令人身軟妊婦雜肉食之令子不利蕭炳云壅諸經
絡氣使四肢不收發風昏昏陳士良云久食發心悸
及癰疽瘡癤中痛合酒食之醉難醒然愚意觀之其

為害未必如此之甚蓋天生五穀以食人皆稟土中
冲和之氣可常御而無害者第糯米氣溫性黏滯惟
不和於上焦有痰熱及脾病不能轉運小兒難於尅
化者餘皆無害諸家之言不可盡信也

醬味鹹酸冷利主除熱止煩滿殺百藥熱湯及火毒

疏○按醬之品不一惟豆醬陳久者入藥其味鹹酸
冷利故主除熱止煩滿及湯火傷毒也能殺一切魚
肉菜蔬葷毒本經云殺百藥毒者誤也聖人不得其

醬不食朱子云食肉用醬各有所宜玩一宜字則不
宜者必有傷害於人非特悅口而已如食蟹用橙醬
或薑醬煮魚用茱萸醬取其能殺毒之義耳又有榆
仁醬味辛美殺諸蟲利大小便心腹惡氣蕪莢醬主
療相同茱萸醬作法不用麩豆鹽只以河水量茱萸
多少稍稍加石灰摻入拌勻甕藏殺一切魚腥毒用
時洗去石灰搗爛烹水族入之良



神農本草經疏卷二十六